



Lírica

Poemas

Noelia Estévez Rionegro

Entre fendas abertas*

A humidade das paredes agochaba feridas
cosidas ás agullas
coas que tecías a lá
que, despois, desfacías coas unllas.

Nunca fun quen de entrar alí...
e ollar para as gretas abertas
onde se arrepiaban os corpos,
amoreados,
naquel cuarto de teito alto
e chan en carne viva.

O vento asubiaba entre as fendas abertas nas fiestras,
e sentíase o eco distorsionado
de voces fragmentadas
mentres apurabas a derradeira puntada.

Nunca fun quen de entrar alí...
e atravesar os muros que ninguén derrubou.
desfacer os nocellos contra a pedra...
e lamber o sangue,
que mana da pel cuarteada
e sabe a vitoria...
...brindar co ferido
rachar
cristais de bohemia...

Varsovia, 2015

* Publicado en *Ana Frank* (coord. X. Susperregi, Biblioteca de las Grandes Naciones, 2019).

O pouso das ánimas

A Patricia Castelo Fernández

Fixeron das túas exequias
o desfile de honra,
pranto vestido de gala,
tan indecente coma improvisado,
do día maior.

Os que non tiñan coartada
plaxiaron condolencias,
e apreixaron os corpos
coma quen espreme laranxas,
cortadas a coitelo,
a noite anterior.

Alí acudiron, coas mans baleiras,
encher a praza de miseria,
reclamo de miserables,
sobre o pouso das ánimas,
espello da insignificancia,
bafo do alento entumecido
dos que, de coraxe e carraxe tinguidos,
alí ficaban.

Compostela, 25 de xullo de 2013